



Sikuki Nuuk Harbour A/S –imi maleruagassat

1. juli 2016

IMARISAI

Kapitali 1	Nalunaarutiginninneq, pulajartorneq pituttornerlu	3
Kapitali 2	Usilersorneq usingiarnerlu	6
Kapitali 3	Umiarsuarnik iluarsaaneq, uninngatitsineq il.il.	8
Kapitali 4	Umiarsualivimmi nunaminertanik atuineq	10
Kapitali 5	Maleruagassatut aalajangersakkat assigiinngitsut	12
Kapitali 6	Akisussaaffiit	15
Kapitali 7	Pineqaatissiissutit	16
Kapitali 8	Maalaaruteqarsinnaaneq	16

Kapitali 1

Nalunaarutiginnineq, pulajartorneq pituttornerlu

- § 1. Malittarisassat uku Sikuki Nuuk Harbour A/S-ip umiarsualivianut nunamilu sanaartukkanut allanut atuupput. Sikukip sanaartugaanut toqqaannartumik oqartussaaffik aneq Sikuki Nuuk Harbour A/S -imiippoq, aalajangiinerilli ilaat Naalakkersuisunut maalaarutigineqarsinnaallutik, takuuk kap. 8.
- § 1 a. Sikuki Nuuk Harbour A/S Naalakkersuisut sinnerlugit, umiarsualiviup imartaanut umiarsualivinni malittarisassaqaartitsineq pillugu Namminersornerullutik Oqartussat nalunaarutaat nr. 1, 4. januar 2000-imeersoq naapertorlugu ingerlanneqartunut, najukkami umiarsualivimmi atuuttumik oqartussaasuvoq. Kalaallit Nunaanni Namminersornerullutik Oqartussat umiarsualivinni malittarisassiaat, malittarisassanut ukununnga ilanngullugit nassiunneqarput. Umiarsualivimmili malittarisassat immikkoortui umiarsualiviup imartaanut tunngasut, malittarisassanut ukununnga ilanngunneqarput. Aalajangersakkat/kapitalit, umiarsualivinni maleruagassaneersut "(HR)"-imik naggaserneqartarput.
- Stk. 2. Ajornangippat akornuteqaqngitsumik umiarsualivissinnissamut umiarsualivimmiinnissamullu umiarsualivimmi oqartussat akisussaasuupput. Tamatuma qulakkeerneqarnissaanut iliuusissat umiarsualivimmi oqartussat nalilersuinerat naapertorlugu isumagineqassapput (HR).
- Stk. 3. Umiarsuaq umiarsualivimmut tikitsinnagu umiarsuup naalagaa, isumaqatiginninniartartua sinniisualuunniit umiarsualivimmut oqartussaasunut saaffiginnissaaq tamatumunngalu atatillugu umiarsuaq pillugu paasissutissat, piffissaq tikiffissatut naatsorsuutigineqartoq, umiarsualivissinnissamut siunertaq piffissarlu umiarsualivimmiiffissatut naatsorsuutigineqartoq paasissutissiissutigissallugit.
- Stk. 4. Umiarsualivimmi oqartussat piumasarippassuk nalunaarutiginnittup umiarsuup pisortatigoortumik pappialaatai takutissavai, taamatuttaaq umiarsuaq, usit piginnittuunermilu pissutsit pillugit pisariaqartinneqartunik tamanik paasissutissiissalluni.
- Stk. 5. Umiarsualivimmut oqartussaasut umiarsuup pappialaatai uppernarsaataalu imaluunniit taakku ilaat umiarsuup umiarsualivimmiinnerani umiarsualivimmi oqartussanut paarisassanngortinneqarnissaat piumasarisinnaavaat.
- Stk. 6. Umiarsuup tikissinnaanissaanut umiarsuup piginnittuata, atuisup imal. isumaqatiginninniar-tartuata / sinniisuata umiarsuarmut piumasaqaataasinnaasunut tunngatillugu, umiarsualivimmi oqartussanut naammaginartumik qularnaveeqqusiinissaa umiarsualivimmi oqartussat piumasaqaatigisinnaavaat.
- Stk. 7. Umiarsuarnik ulorianartunik usilinnik nalunaarutiginnittarnermut § 7-imi maleruagassat atuupput.
- § 1a. Umiarsualivimmi oqartussat containereqarfik nutaaq illutaalu Royal Arctic Line A/S-imut atukkiuppai. Alla atukkiussamut periarfissaqarpat, Royal Arctic Line A/S-ip immikkut maleruagassiai ilitersuutillu aalajangersimasut malinneqassapputtaaq. Royal Arctic Line A/S-ip immikkut maleruagassiai umiarsualivimmi oqartussanit akuerisaapput.

Umiarsuup qanoq issusaa

- § 2. Umiarsuaq piffissami nalunaarutiginniffiusumi umiarsualivimmiinnermilu imaatigut angalasinnaassuseqassaaq, umiarsuullu qanoq issusaa tamakkulu pillugit maleruagassat Kalaallit Nunaanni atuuttut naapertorlugit uppersaatinik pisariaqartinneqartunik tamanik pilersorneqarsimassalluni.

Talinngasarfik

- § 3. Umiarsualivimmut oqartussaasut umiarsuit talinngaffissaat tulleriarinerlu maleruagassiussavaat. Tulleriarinermi umiarsuit aalajangersimasumik ingerlaartut aalajangersimasumik talittarfillit, umiarsuullu Namminersorlutik Oqartussanit akuersissut imal. kiffartuussinissamik isumaqatigiissut naapertorlugu pilersuisussaataasut, pingaarnertut inissisimapput. Tamatuma saniatigut umiarsualivimmi oqartussat umiarsuit talinngaffissarsitinneqarnissaannut atatillugu tulleriarinissaq sukulluunniit aalajangertassavaat.
- Stk. 2. Umiarsualivimmi oqartussat umiarsuit usingiarnissamut usilersornissamullu-, aalisarnermik inuussutissarsiutilinnik immakkullu inunnik angallassisunik kiffartuussinermut- ajoqutaasut peerneqarnissaat piumasarisinnaavaat.
- Stk. 3. Umiarsualivimmi immikkoortuni atukkiussani attartortup tamanna attartortup naliliinera naapertorlugu attartortup suliffeqarfiutaanut annertuumik ajoqutaappat imal. ajoqutaasinnaappat, umiarsuup attartukkamut talinniarnera akerliuffigisinnaavaa.
- Stk. 4. Umiarsualivimmut oqartussaasut umiarsuaq talinngaffissamut quersuaqarfimmut umiarsuup usilersorfigisasaanut usingiarfigisasaanulluunniit qanittumiittumut sallinngortissinnaavaat.
- Stk. 5. Imerpalasunik gassinilluunniit ataatsimoortunik usilersorneq usingiarnerluunniit, inatsisit malillugit tankinut taakkununga naatsorsuussanut taakkunangaanniillu tamatumunnga taliffissatut aalajangikkani pissaaq.
- Stk. 6. Umiarsuit inissamut umiarsualivimmi oqartussat innersuussutigisaannut pituttorneqassapput, tassangaanniillu umiarsualivimmi oqartussat akuersissuteqaqqaartinnagit nuuttoqassanngilaq.
- Stk. 7. Umiarsualivimmi oqartussat umiarsuaq inissamut allamut nooqqusinnaavaat suliakkiissullu malinneqassanngikkaluarpat umiarsuup akiligassaanik akisussaaffigisaanillu umiarsuaq nooqqusinnaallugu.
- Stk. 8. Umiarsualivimmi oqartussat allani pituttorneqarsimannippata, sunngiffimmi angallatit umiarsualivimmi inissanut tamatumunnga naatsorsuussanut pituttorneqassapput.

Kisarsimaneq (HR)

- § 4. Umiarsualivimmi oqartussat immikkut akuersissuteqarsimangippata umiarsualiviup imartaani umiarsualivimmullu pulajartortarfinni pisariaqarluinnartinnagu kisartoqassanngilaq.
- Stk. 2. Umiarsuit umiarsualiviup imartaani kisarsimasut umiarsuup angissusaa naapertorlugu inuttat naleqquttumik amerlassusillit umiarsuarmiitinnissaannut pisussaapput pissusissaatullu radiokkut pingaartoqartitsissallutik.
- Stk. 3. Umiarsuaq akornuteqanngitsumik isumannaatsumillu angallanniissamut akornutaasutut umiarsualivimmi oqartussanit nalilernerqarpat, umiarsualivimmi oqartussat umiarsuit umiarsualiviup imartaani kisartut nuunneqarnissaat piumasarisinnaavaat.
- Stk. 4. Piffissaq killiliusaaq qaangerlugu kisarsimasoqarpat, umiarsuup akiligassaanik akisussaaffigisaanillu umiarsualivimmi oqartussat umiarsuaq nuutsissinnaavaat.
- Stk. 5. Umiarsualivimmi oqartussat immikkut akuersissuteqartinnagit umiarsuit kisartalimmik pituutserlutik uninngaqqusaanngillat imaanillu umiarsualiviulluunniit imartaanik pituuttanik asseeqqusaanatik.

Umiarsualivimmi angalaneq (HR)

- § 5. Ilaatigut umiarsualiveqarfik, umiarsuit taakkuluunniit pituttorneri ajoquseqqunagit umiarsualivimmi naammaannartumik illersorneqarsinnaasumillu sukkassusilimmik ingerlasoqartassaaq.
- Stk. 2. Søfartsstyrelsip imaatigut angalanermut il.il. maleruagassiai atuuttut, umiarsualivimmi ingerlaarnermut atuupputtaaq.

Pituttorsimaneq

- § 6. Umiarsuit taamaallaat talittarfimmi pituffinnut, naatiffinnut nigalinnuunniit taamaaliornissamut naatsorsuussanut pituttorsinnaapput. Umiarsualiviup sannaq umiarsuilluunniit allat ajoquserneqaqqunagit talittarfiup tungaanut umiarsuit naammattunik attuussaanaveeqqu-sersimassapput. Taamatuttaaq umiarsualivimmi oqartussat pituttornissamut tunngatillugu innersuussutigisinnaasaat malinneqassapput. Akornuteqanngitsumik ingerlasoqarnissaanut umiarsualiviullu kivittaataanut il.il. akornutaanngitsumik, isumannaatsumik qaammaqqusikkamillu nunamut ikaartarfiliisoqarnissaa, umiarsuarmit isumagineqassaaq.

- Stk. 2. Umiarsuit arlallit avaleriiaarlutik pituttorsimappata, umiarsuit umiarsuarmit avallermit tunorliusut akornuteqanngitsumik, isumannaatsumik qaammaqqusikkamillu umiarsuup qaavatigut taamatullu umiarsuarmiit umiarsuamut aqutissaqarnissaa isumagissavaat.
- Stk. 3. Pisariaqartillugu imeq kuuttoq umiarsuarnut allanut talittarfimmulluunniit kuuttussaajunnaarlugu, umiarsuup saneraani kuuffiit ammarngi tamarmik isumannaatsunik assiaqutsersimassapput.
- Stk. 4. Umiarsuit teriarsuaqarsorisaasut imaluunniit ajoqutaasinnaasunik allanik uumasoaqarsorisaasut uumasut ajoqutaasut nunamukarsinnaajunnaarsillugit pituutaminnut saviminernik assiaqutsiissapput.

Kapitali 2

Usilersorneq usingiarnerlu

Usit ulorianartut

- § 7. Umiarsuit usinik ulorianartunik assartortut, ilaatigut makkunanga usilersortut usingiartulluunniit:
- 1) atortussianik qaarsinnaasunik,
 - 2) silaannaap akuinik naqitanik allanilluunniit,
 - 3) imerpaldasunik ikuallajasunik,
 - 4) atortussianik ikuallajasunik, nammineerlutik ikuallassinnaasunik imaluunniit silaannaap akuinik imermut akuliullugit ikuallassinnaangortitsisartunik,
 - 5) atortussianik ikuallatitsissinnaasunik,
 - 6) atortussianik tunillannartulinnik,
 - 7) ulorianartunik – radioaktivinik qinngornilinnik,
 - 8) atortussianik neriorlugit nungujartortitsisartunik kiisalu
 - 9) usit allat, (International Maritime Dangerous Goods/IMDG naapertorlugu ilisarnaasikkat), kingusinnerpaamik tikinnissaq nalunaaquttap akunnerinik 24-nik sioqqullugu umiarsualivimmi oqartussanut nalunaarutigineqassapput.
- Stk. 2. Nalunaarutiginninnermi usit suunerat, annertussusaat (amerlassusaat oqimaassusaallu tamakkerlugit) ulorianassusaat, UN-normuat, poortuutaat ittujaarneqarfiallu ilanngunneqassapput.
- Stk. 3. Immikkut ittumik pisoqartillugu sivikinnerusumik piffissaliilluni nalunaarutiginnittoqarnissaa umiarsualivimmi oqartussat akuersissutigisinnaavaat. Ajornartorsiulernerit eqqaassanngikkaanni umiarsualivimmut oqartussaasut akuersissuteqareersinnagit umiarsuaq umiarsualivimmut talissanngilaq.
- Stk. 4. Usit ulorianartut, Kalaallit Nunaanni, Danmarkimi nunanilu tamalaani maleruagassani (IMDG) allassimasut kaammatuutigineqartulluunniit naapertorlugit poortorsimassapput, nalunaaqutsersimassallutik, ittujaarsimassallutik, immikkoortinneqarsimassallutik isumannaallisarneqarsimassallutillu.

Stk. 5. Umiarsuit usinik ulorianartunik assartortut, usilersortut usingiartulluunniit, avatangiisinut isumannaallisaanermullu tunngatillugu maleruagassanik-, suliffimmi avatangiisit pillugit maleruagassanik atuuttunik kiisalu tamakkunanga assartuinissamut piumasaqaatinik naammassinnissimangitsut, umiarsualivimmi oqartussanit peeqquneqassapput. Umiarsualivimmi oqartussat usilersorneq usingiarterluunniit aallartinneqareersoq unitseqqusinnaavaat umiarsuarlu umiarsualivimmiit ingerlaannaq qimaguteqqusinnaallugu.

Stk. 6. Umiarsualivimmi oqartussat kommunimi annaassiniartartut isumasioqatigeriarlugit:

a) usit ulorianartut suliarinissaannut pisariaqartinneqartunik isumannaallisaasoqanngippat umiarsuit talissinnaajunnaarsissinnaavaat.

b) umiarsuit umiarsuarmi nunamiluunniit pisariaqartinneqartunik isumannaallisaqqullugit peqqusinnaavaat tamakkunungalu aningaasartuutunik akileeqqusinnaallugit.

Umiarsualivimmi oqartussat pisinnaatitaaffigaat:

1) usinut ulorianartunut tunngatillugu isumannaallisaanermi iliuusissat pisariallit naammassineqarsinnaanngippata umiarsuit talinnissaat itigartitsisinnaavaat.

2) isumannaallisaanermi iliuusissat pisariallit umiarsuarmi nunamiluunniit isumagineqarnissaat tamakkunungalu tunngatillugu aningaasartuutunik akiliinissamik umiarsuarnut piumasaqaateqarsinnaaneq.

Ikuallattoornissamut ulorianartoqarneranik kalerrisaarut (HR & Sikuki/umiarsualivik)

§ 8. Umiarsuit umiarsualivimmiinnerminni ulorianartunik useqartillutik ikuallattoornissamut ulorianartoqarneranut kalerrisaaruteqassapput.

Stk. 2. Ikuallattoornissamut ulorianartoqarneranik kalerrisaarut umiarsuarmi takussaanerpaasunngorlugu inissineqarsimassaaq- taanna ullukut nunat tamalaat kalerrisaarutitut erfalasoaraat B unnuakkullu qulliulluni killingusaaq tamaat kaajallallugu aappalaartumik qaamanilik.

Tassanngaannartumik aallarnej

§ 9. Umiarsuaq ikuallattoornissamut ulorianartoqarneranik kalerrisaarutilik piffissap qanoq ilineraniluunniit pituussaarnissaminut piareersimassaaq nammineerlunilu ingerlaannaq aallarsinnaassalluni.

Stk. 2. Umiarsuarni imerpalasunik assartuutini nunamut pituuttat allunaasaassapput qaammaqqusikkat. Allunaasarsuit kaligutit, umiarsuup siuani aquanilu immap qaavanut ningeriaannanngorlugit aalajangikkat ikuallassinnaanngitsunik sananeqaateqassapput. Umiarsuup aallarnissaanut sukkulluunniit pisariaqartinneqartunik inuttanik umiarsuarmiittoqartassaaq.

Usilersornermut / usingiarnermut tunngatillugu aalajangersakkat

- § 10. Umiarsuarmi usilersorneq usingiarnerluunniit -umiarsualivimmi oqartussat naliliinerat naapertorlugu- nalinginnaasumik sukkassuseqarluni ingerlanneqanngippat, taamaattumillu nioqqutissanut pineqartunut piffissap nalinginnaasumik atorineqartartup iluani sulineq naammassineqarsinnaanngippat, umiarsuaq alla usilersorfissaminik usingiarfissaminilluunniit utaqqisaqarpat, umiarsualivimmi oqartussat tamanna pillugu siumut nalunaareerlutik, umiarsuup nammineq akiligassaani nuunneqarnissaa imaluunniit umiarsualivimmiit qimagukkallarnissaa piumasarisinnaavaat.
- Stk. 2. Sulineq piffissaq eqqorlugu aallartinneqarsimagaluarpalluunniit unitsinnagulu ingerlanneqarluni-umiarsualivimmi oqartussat pisariaqartippassuk- umiarsuaq peersillugu talinngaffissamut allamut nuunneqassaaq. Usilersorneq usingiarnerluunniit nangingeqarsinnaaqullugu umiarsuaq talinngavissaminik piumasaqarnissamut sallinneqassaaq.

Maangaannartitsineq

- § 11. Usit avammut kuutsinneqannginnissaat maangaannartinneqannginnissaalluunniit isumannaarniarlugu umiarsuaq pisariaqartinneqartunik iliuseqassaaq. Taamatut avammut kuuttoortoqarpat maangaannartitsisoqarpalluunniit avammut kuuttoorneq maangaannartitsinerluunniit umiarsuup ingerlaannaq unitsissavaa, nammineerlunilu sukumiisumik saliisoqarnissaa isumagalugu. Umiarsualivik avammut kuuttoorneq maangaannartitsinerluunniit pillugu ingerlaannaq kaleqqinneqassaaq, umiarsualiviullu innersuussineri malinneqassallutik. Tamanna orsersornermissaaq atuuppoq.
- Stk. 2. Avammut kuutitsineri maangaannartitsinermilu avatangiisit pillugit inatsimmi maleruagassat aamma atuupput.
- Stk. 3. Atortussianik ulorianaatilinnik ajutoortoqariasaartillugu qatserisartut nalunaarfigineqartassapput.

Umiarsuit imerpalasunut assartuutit

- § 12. Usinik ulorianartunik usilersorneq usingiarnerlu sapinngisamik tikinnerup kinguningua aallartinneqartassaaq, taakkulu imaarsarneqarnerat, usilersorneq usingiarnerluunniit naammassineqarsarlugit sapinngisamik sukkanerpaamik ingerlanneqassalluni.
- Stk. 2. Umiarsuup imerpalasunut assartuutip usinik ulorianartunik usilersoreersup, umiarsualivimmiiginnarnissaminut umiarsualivimmi oqartussanit erseqqissumik akuersissuteqarfigineqarsimannikkuni, umiarsualivik ingerlaannaq qimassavaa. Umiarsuup imerpalasunut assartuutip usingiariikkap gaseerussimangitsup imaluunniit gassimik

susinnaangitsumik isumannaallisagaangitsup usingiariikkap taamatutaaq umiarsualivik ingerlaannaq qimassavaa.

Kapitali 3

Umiarsuarnik iluarsaaneq, uninngatitsineq il.il.

Umiarsuarnik iluarsaaneq

- § 13. Umiarsuaq umiarsualivimmiitillugu timitaanik, maskiinaanik, atortulersuutaanik assigisaannillu iluarsaanerit umiarsualivimmi oqartussat akuersissuteqaqqaartinnagit aallartinneqassanngillat.
- Stk. 2. Umiarsuarnik atortuinillu umiarsualivimmi uninngatinneqartunik iluarsaaneq assigisaaluunniit, avatangiisit suliffimmilu avatangiisit pillugit aalajangersakkat naapertorlugit suliarineqartassapput.
- Stk. 3. Taamatutaaq umiarsuit iluarsarneqarneranni aserfallatsaalineqarnerannilu sulineq- umiarsualivimmi oqartussat naliliinerat naapertorlugu- inuit allat avatangiisillu akornusersorneqaratik umiarsualiveqarfillu mingutsinneqarani ingerlanneqassaaq.

Silataasa suliarineqartarnerat

- § 14. Umiarsuit amutsiveqarfiit avataanni immamiittut silataannik suliarinninnissaq inerteqqutaavoq.
- Stk. 2. Silataanik suliarinninneq tassaavoq naqitsineq atorlugu supoorummik atortoqarluni atortoqaranilu seqqattaaneq, sioqqanik imermik akulinnik akoqanngitsunillu manissaaneq kiisalu saviminermik manngersaaneq seqqattaallu atorlugu qalipaaneq.

Umiarsuit uninngatitat qimatallu (HR & Sikuki/umiarsualivik)

- § 15. Umiarsualivimmi oqartussat siumut akuersissuteqareerpata aatsaat, umiarsuarmik umiarsualivimmi uninngatitsisoqarsinnaavoq. Taama akuersissuteqartoqassappat akuersissut taanna suliasatigut innersuussutinik-, aningaasaqarnikkut qularnaveeqquusiinissaq pillugu piumasaqaatinik-, piffissaliussatut aalajangikkat malinneqarnissaannik-, nakkutilliisoqarnissamik il.il. pisariaqartitanik imaqqassaaq.
- Stk. 2. Umiarsuit angalanngitsut taamatutaaq umiarsuit atorunnaarnikut, umiatsiat, prammit, qillerinermut atortut atortullu allat kiisalu usit umiarsualiveqarfimmi pulajartortarfimmiluunniit umiarsualivimmi oqartussat erseqqissumik akuersissuteqarsimatinnagit qimaannarneqassanngillat uninngatinneqaratilluunniit.
- Stk. 3. Umiarsuit atortulluunniit uninngatitat qimatalluunniit sutigut tamatigut piginnittup akiligassaanic akisussaaffigisaanillu uninngatitaapput § 17-ilu naapertorlugu peeqquneqarsinnaallutik.

Umiarsuit aseqqukut il.il. (HR)

- § 16. Umiarsuit aseqqukut, umiarsuit ikuallattut, umiarsuit kiveriaannaat annertuumilluunniit ajoquserneqarsimasut assigisaallu, umiarsualivimmi oqartussat immikkut akuersissuteqarsimatinnagit umiarsualivimmut tikiunneqassanngillat. Akuersissut taamaattoq taamaaliorsinnaanermut piunasaqaatinik erseqqinnerusunik imaqassaaq- ilaatigut umiarsualivimmi oqartussat sukkulluunniit sillimmasiisoqarsimanissaanik piunasaqaateqarsinnaanerannik, kiisalu suliassat ulorianartorsiorneq imaluunniit ulorianartorsiuulersinnaaneq pinngitsoortinniarlugu, pisariaqartinneqartutut umiarsualivimmi oqartussat naliligaasa, ingerlaannaq aallartinneqarnissaannik piginnittumut piunaffiginnissinnaaneratt. Umiarsuit aseqqukut assigisaallu sutigut tamatigut piginnittup akiligassaanik akisussaaffigisaanillu uninngatinneqartarput.

Umiarsuarnik uninngatitanik il.il. peersitsineq (HR & Sikuki/umiarsualiviit eqqaanni)

- § 17. Umiarsuit uninngatitat, qimatat, kivisimasut, ikkarlissimasut imaluunniit aseqqukut (taakku atortulersuutaat iluaqusersuutaalluunniit ilanngullugit) taamatuttaaq usit atortullu qimatat, umiarsualivimmi oqartussat naleqquttumik piffissaliillutik nooqqusinnaavaat. Umiarsualivimmi oqartussat peqqusinerat malinneqanngippat, umiarsualivimmi oqartussanut annertuumik aningaasartuutaasumik persaqusersuutaasumillu pineqartoq paaqqutariinnarneqarpat, umiarsualivimmi oqartussat piffissamik killiliussamik siumut nalunaarlutik, pineqartup akiligassaanik, tunisassanngorlu peerneqarnissaa isumagisinnaavaat. Umiarsualiviup sapinngisamik tunisinissaq sioqqullugu piginnittoq ilisimatissavaa.
- Stk. 2. Tunisinermi isertitat umiarsualivimmi oqartussat aningaasartuutaasa ilaannakumik tamakkiisumilluunniit matussuserneqarnissaannut atorneqarsinnaapput.
- Stk. 3. Nalilersuisartuq arlaannaannulluunniit attuumassuteqanngitsoq pineqartoq naleqanngitsutut nalunaarutigippagu nalingaluunniit tunisinermi aningaasartuutissatut naatsorsuutigineqartunit annertunerunngippat, umiarsualivimmi oqartussat piginnittumut allakkatigut nalunaaruteqaqqaarlutik taanna peersissinnaavaat. Piginnittoq taassumaluunniit najugaa umiarsualivimmi oqartussanit ilisimaneqanngippat, angallammi pigisamiluunniit allagarsiinikkut aviisimiluunniit nuna tamakkerlugu saqqummersartumi nalunaaruteqartoqarsinnaavoq.
- Stk. 4. Taamatut tunisisoqarnera peersisoqarneraluunniit apeqqutaatinnagu piginnittoq umiarsualivimmi oqartussat aningaasartuutaannut tamakkiisumik akiliisussaataajuassaaq.

Kapitali 4

Umiarsualivimmi nunaminertanik atuineq

Pigisanik uninngatitsineq

- § 18. Usissat usingiakkalluunniit umiarsualivimmi oqartussat akuersissuteqartinnagit talittarfinni, talittarfiit aqquserngini, attaveqarfittut aqquserngini uninngatitsivissatulluunniit aalajangersakkani uninngatinneqassanngillat.
- Stk. 2. Usit pineqartut umiarsualivimmi oqartussat isumaat naapertorlugu pisariaqartitsippata umiarsualivimmi oqartussat peqqusisinnaatitaapput iliuseqarsinnaatitaallutik uninngatitsivissamillu innersuussisinnaatitaallutik.
- Stk. 3. Aalajangersakkat atuuttut naapertorlugit pigisanik uninngatitsinermi, nunaminertanik atuinermut umiarsualivimmi oqartussanut akiliuteqartoqartassaaq.

Pigisanik uninngatitanik peersineq

- § 19. Umiarsualivimmi oqartussat piumasarippassuk naammaginartumik piffissaliussatut aalajangikkap iluani pigisat uninngatitat peerneqassapput inissiivissatulluunniit innersuunneqartumut nuunneqassallutik.
- Stk. 2. Peqqussut malinneqanngippat pigisalluunniit umiarsualivimmi oqartussat akuersiteqqaarnagit uninngatinneqarpata, § 17 naapertorlugu pigisat umiarsualivimmi oqartussat peersisinnaavaat.

Angallanneq qamutinillu uninngatitsisarneq

- § 20. Umiarsualivimmi oqartussat umiarsualiveqarfimmi angallanneq pillugu innersuussuteqarsinnaapput.
- Stk. 2. Angallanneq pillugu inatsimmi maleruagassat naapertorlugit aatsaat umiarsualiveqarfimmi qamutinik inissiivissani tamatumunnga atugassiani- pisariaqarpallu umiarsualivimmi oqartussat innersuussutaanni- uninngatitsisoqarsinnaavoq.
- Stk. 3. Immikkut ittumik pisoqartillugu umiarsualivimmi oqartussat immikkut usilersornernut usingiarnernulluunniit atatillugu qamutit uninngavissaannik innersuussisinnaapput.

Eqqakkat

- § 21. Umiarsualiveqarfimmi eqqakkat niorarneqaratillu uninngasussanngortinneqassanngillat. Eqqakkanut containerit inissitat avatangiisinut ajoquisiinnaasunut imaluunniit atortunut ulorianartunut atorneqassanngillat. Containerit taamaallaat umiarsuarni nalinginnaasumik ingerlatsinermi eqqakkanut naatsorsuussaapput allanillu atorneqaqqusaanatik.
- Stk. 2. Ingerlatsinermi eqqakkat nalinginnaasut saniatigut umiarsuarnit eqqakkat tunniunneqartarne-rannut, umiarsuarnit eqqakkanik tigooraasarneq pillugu umiarsualivimmi oqartussat aalajangersagaat avatangiisillu pillugit inatsit atuupput.

Eqqiaaneq torersaanerlu

- § 22. Umiarsuaq, usinik piginnittoq taakkuluunniit sinniisumittut piginnaatitaat, usilersorneq usingiaanerluunniit naammassereerpat umiarsualivimmi nunaminertat atorneqarsimasut eqqiassavaat taakkunanngalu eqqagassat tamaasa piissallugit. Taamaaliortoqanngippat umiarsualivimmi oqartussat- pineqartup akiligassaanik -tamatuminnga suliaakkiisinaapput.
- Stk. 2. Umiarsualivimmi oqartussat isumaqatigiissuteqarfigineqarsimanngippata containerit, palletsit, qamutit kalittakkat, umiarsuarnik usilersuisartut usingiaasartullu atortui, assartuinermi atortut, aalisarnermi atortut aalisakkanullu karsit il.il., sulinerup naammassinerani talittarfinnut, talittarfiit aqqusernginut, talittarfinnut attaveqaataallutilluunniit aqqusinernut qimanneqassanngillat.
- Stk. 3. Atortut il.il. qimatat tamarmik piginnittup akiligassaanik akisussaaffigisaanillu uninngatinneqassapput.

Kapitali 5

Maleruagassatut aalajangersakkat assigiinngitsut

(HR & Sikuki/umiarsualiviit sanaartukkallu aalajangersimasut allat eqqaanni)

Inerteqqutit

- § 23. Umiarsualiveqarfimmi inerteqqutaapput:
- 1) Eqqagassanik suugaluunik taamatuttaaq usit sinnerinik imaanut eqqaaneq.
 - 2) Eqqakkanik imerpalasuunngitsunik imerpalasuunillu suugaluunik -ilaatigut uuliamik, akuutissanik, anartarfinnit igitassanik, umiarsuarmi erngup kuuffiiniit assigisaanniillu igitassanik imerpalasuunik kiisalu erngup amiakkuanik tamakkunannga akulimmik ikuallaaneq, avammut kuutsitsineq, avammut imaarsineq uninngasussanngortitsinerluunniit. Ajutoortoqassappat

umiarsualivimmi oqartussat ingerlaannaq nalunaarfigineqassapput tamakkulu ingerlaannaq iginneqassallutik, takuutaaq § 11 imm. 2 aamma 3.

- 3) Aallaaniarneq allatulluunniit aallaasersorneq.
- 4) Suliat putsumik, pujoralammik, tipimik nipiliornermilluunniit ippigusutsitsinermik pisariaqanngitsumik kinguneqartut, taamatutaaq nilliasaammik siggartaammillu pisariaqanngitsumik atuineq.

Akuersissutaaqqaartariallit

§ 24. Umiarsualivimmi oqartussat akuersiteqqaarnerisigut makku suliarineqarsinnaapput:

- 1) Maskiinamik ingerlatitsineq. Taamaaliornissamut akuersissuteqartoqassappat, immap itissusaanik allannguisumik imaluunniit umiarsualivimmi sanaartukkanik, umiarsuarnik allanik, prammik, tuussassiarsuarnik assigisaannillu ajoqusiisumik imaluunniit umiarsuit saneqquttut sarpissornerisa qalaliornerannik aqunneqarsinnaajunnaarsitsisumik sakkortussuseqassanngilaq. Umiarsualivimmi oqartussat piumasarippassuk maskiinamik ingerlatitsineq unitsinneqarsinnaanngorlugu, maskiinamik ingerlatitsineq tamaat umiarsuarmi pigaartoqassaaq. Pigaartup umiarsualiviup VHF kanalia naalaassavaa. Umiarsualivimmi oqartussat piumasarippassuk maskiina ingerlatilersinnagu umiarsuup aqua umiarsualivimmiit avalatsinneqassaaq.
- 2) Umiarsuarmi nalinginnaanngitsumik sakkortuumilluunniit qullilersorneq imaluunniit umiarsuarmik qaammaqqusiineq. Qullermik sakkortuumik ass. seqersittaatinik atuineq siunertamut naleqquttuusaaq umiarsuillu angallannerannut, nunami angallannermut assigisaannullu akornutaassanani.
- 3) Amutsiviit avataanni umiarsuarni innermik assiaqutaqanngitsumik ikumatitsineq. umiarsualivimmi oqartussat ikuallattoornissamut pigaartoqarnissaa piumasarisinnaavaat.
- 4) Qummoroortarneq. Qummoroortassagaannili politiit akuersiseqqaarnissaat piumasaqaataavoq.
- 5) Aalisarneq.
- 6) Atortussanik nissinniaaneq uninngasuuteqarnerluunniit.
- 7) Immap qaagut sisoraaserluni saarlisaarneq, sukkanniunneq, imaatigut saarlisaarutininik atuineq, qamuterallannik imarsiutinik assigisaannillu angallateqarluni ingerlaarneq.
- 8) Umiarsuarniit sissiukkaniilluunniit nalunneq
- 9) Angallatinik angerlarsimaffigisanik inissiineq

Stk. 2. Umiarsualivimmiit 15 meterinik qaninnerusumi sikunik qaartitsineq umiarsualivimmi oqartussat isumaqatigiissuteqarfigeqqaarlugit aatsaat pisinnaavoq.

Usit qimatat aamma usit annaassat

- § 25. Umiarsualivimmi suulluunniit nassaarineqartut, qaqinneqartut annaanneqartulluunniit umiarsualivimmi oqartussaasunut- politiinut ilisimatitsisussanut - ingerlaannaq nalunaarutigineqassapput.

Ikisinnaatitaaneq

- § 26. Umiarsualivimmi oqartussat taakkulu toqqagaat, maleruagassap matuma malinneqarnissaanut atatillugu sukkulluunniit umiarsuarmut ikaarsinnaatitaapput. Umiarsuup naalagaa nakkutillii-nermut umiarsuarmillu misissuinermut atatillugu pisariaqartinneqartutut ikiutissaaq. Umiarsuup takuniarneqarneranut misissorneqarneranullu atatillugu umiarsuup naalagaa pisariaqartitsineq naapertorlugu ikiutissaaq.
- Stk. 2. Taamatut ikisinnaatitaaneq itigartitsissutigineqarpat killilerneqarpalluunniit imaluunniit pisariaqartinneqartutut ikiuttoqangippat, umiarsuup umiarsualivimmiit ingerlaannaq qimagunnissaa umiarsualivimmi oqartussanit piumasaqaataasinnaavoq.

Umiarsualivimmi oqartussat

- § 27. Umiarsualiveqarfiup torersuutinnissaanik piumasaqaatip malinneqarnissaa umiarsualivimmi oqartussat sulisuisa nakkutigissavaat.
- Stk. 2. Piumasarineqarpat sulisut kinaassutsiminnut uppersaammik takutitsissapput.
- Stk. 3. Kinaluunniit umiarsualiveqarfimmiittoq umiarsualiveqarfimmi oqartussat innersuussinerinik peqqussutaanillu malinnittussaataavoq.
- Stk. 4. Politiit, kommunimi qatserisartut oqartussallu allat inatsisini maleruagassat nalinginnaasut malillugit umiarsualiveqarfimmi suliassat suliarissavaat.

Umiarsuup naalagaa

- § 28. Maleruagassani ukunani aalajangersakkat imaluunniit umiarsualivimmi oqartussat peqqussutaat umiarsuup naalagaanit allanilluunniit malinneqangippata, umiarsualivimmi oqartussat pisariaqartitsineq naapertorlugu iliuuseqarsinnaatitaapput.

- Stk. 2. Umiarsuup nuunneqarnissaanik, pituttorsimaneranik assigisaannillu naalakkiineq umiarsuup naalagaa umiarsuarmiingippat aquttumut najuuttumut qullersaasumut imaluunniit aquttumik najuuttoqanngippat inuttamut allamut nalunaarutigineqassaaq.
- Stk. 3. Umiarsuaq inuttanit tamanit qimanneqarpat inuup umiartornermik ilisimasallip umiarsualiviup qanittuani najugaqartup aqqa, najugaa oqarasuaataatalu normua umiarsuup naalagaata nalunaarutigissavai. Inuk taanna umiarsuarmik nakkutilliisuussaaq umiarsualivimmilu oqartussat umiarsuup naalagaanut peqqusinertulli sunniuteqartussamik piumaffigisinnaavaat.

Kapitali 6

Akisussaaffiit

Umiarsuup inuullu allap akisussaaffii

- § 29. Umiarsuarmik umiarsualivimmik atuisartumik piginnittoq ajoqusiinernut tamanut (ilaatigut pigisanik, inunnik malitsigisaasunullu ajoqusiinernut), umiarsuarmi sulisut kukkunerinik imaluunniit sulinerminni sumiginnaaneranik patsiseqartunut akisussaavoq. Akisussaaffigineqartut tassaapput talinnermut-, talinnganermut-, umiarsualivimmik atuinermut-tassanngaanniilluunniit aallarnermut atatillugu, toqqaannatumik toqqaannanngitsumilluunniit ajoqusiinerit.

Umiarsualivimmi oqartussat akisussaaffii

- § 30. Umiarsualivimmi oqartussat sulisuisa kukkunerisigut sumiginnaanerisigulluunniit ajoqusiisoqarsimappat, umiarsualivimmi oqartussat umiarsuarmi ajoqusikkanut-, usinut umiarsuarmiittunut-, umiarsuup inuttaanut ilaasuinullu akisussaapput.

Kapitali 7 (HR & Sikuki/ umiarsualiviup sanaartukkallu aalajangersimasut allat eqqaanni)

Pineqaatissiissutit

- § 31. §§ 1-16, 20-24, 26-imi 28-milu aalajangersakkanik unioqqutitsineq immikkut akitsuusiinermik kinguneqarsinnaavoq. Sukannerulerulersitsisumik pisoqarpat saniatigut piffissami aalajangersimasumi umiarsualiveqarfimik atuisoqarsinnaassanngilaq.

Kapitali 8

Maalaaruteqarsinnaaneq

- § 32. Matumani maleruagassanik unioqqutitsinerit umiarsualivimmi oqartussanut maalaarutigineqassapput.
- Eqqartuussisulersuussinikkut aalajangigassanngortitsinermit, eqqartuussivimmiit Naalackersuisuniilluunniit aalajangiisoqarnissaata tungaanut umiarsualivimmi oqartussat aalajangigaat tamanit malinneqassapput.
- Stk.2 Umiarsualivimmi oqartussat imal. attartortoq umiarsualiviit pillugit Inatsisartut inatsisaanni § 12, imm. 1 (inuussutissarsiorsinnaaneq) imal. § 14 imal. 15 naapertorlugit Naalackersuisunut maalaarutigineqassapput.
- § 33. Najukkami umiarsualivimmi oqartussaasut umiarsualiviup imartaanut tunngasut pillugit aalajangigaat Naalackersuisunut maalaarutigineqarsinnaapput.